

Clypevs Theologiæ Thomisticæ

Continens Tractatus de Beatitudine, de Actibus humanis, eorumque Moralitate; de Virtutibus ac Donis, de Vitiis ac Peccatis, & de Legibus, nec-non Dissertationem Theologicam de Probabilitate

Gonet, Jean-Baptiste

Parisiis, 1669

Art. V. Vtrum quilibet homo in primo instanti usûs rationis teneatur sub mortali ad Deum se conventere, subindeque peccatum veniale cum solo originali esse non possit?

[urn:nbn:de:hbz:466:1-77355](#)

mentum prudenti exhortationi ad judicandum A taliter se habere ad illam, respectu effectuum moralium, ac si physice uniretur. Sicut in probabili sententia omissione pura est actus mortalis, quia æquivalenter est actus physicus, eò quod prebeat fundamentum ad prudenter judicandum, voluntatem pure omittentem taliter se habere in ordine ad transgressionem legis, at si per physicum & positivum actum veller omittere,

^{170.} Objeties ultimò: Si peccatum in ratione offensæ esset simpliciter infinitum, unum peccatum in ratione offensæ alio majus non esset, sed omnia in ratione offensæ essent æqualia: At hoc dici nequit: Ergo nec illud. Minor videtur certa: nam per peccatum odij, vel blasphemiae v. g. Deus magis offenditur, quam per peccatum in temperantie, puta per comedionem carnium die prohibito. Sequela verò Majoris probatur: Unum infinitum non est majus alio in eo genere in quo est infinitum: Ergo si peccatum in ratione offensæ infinitum simpliciter, unum peccatum in hoc genere non erit majus alio, sed omnia in hoc genere, & sub hac ratione erunt æqualia.

^{171.} Respondent aliqui ex nostris Thomistis, ne-gando sequulam Majoris. Ad cuius probationem distinguit Antecedens de infinito per essentiam & in genere entis, & de infinito determinati generis; & assertur quod licet loquendo formaliter de infinito in ratione infiniti, unum non sit major alio, quia in negatione omnimoda termini, in qua ratio infiniti consistit, unum aliud non excedit; materialiter tamen de infinito loquendo, licet infinitum per essentiam, & in genere entis, petat à nullo excedi, infinitum tamen generis determinati, potest naturaliter excedi ab alio infinito; & quia peccatum non est infinitum per essentiam, nec in genere entis, sed in genere determinato, scilicet in genere offensæ, unum peccatum in ratione offensæ alio majus esse potest. Hæc soluto probabilitate non caret.

^{172.} Melius tamen & facilius responderetur, gravitatem offensæ non solum sumi à persona lœsa, sed etiam ab objecto, ab intentione actus, & aliis capitibus, ex quibus sumitur peccatorum malitia. Unde licet gravitas personalis, quæ reperitur in offensa contra Deum commissa, in omnibus peccatis mortalibus æqualis sit; illa tamen quæ ex objecto, ex circumstantiis, & aliis capitibus sumitur, inæqualis est iuxta objecto-rum & circumstantiarum inæqualitatem.

^{173.} Potest hæc solutio illustrari & explicari ex doctrina desumpta ex tractatu de Incarnatione, ubi Theologi duplēm bonitatem & valorem distinguunt in actionibus Christi Domini; alterum ex objecto & circumstantiis, qui idcirco vocatur *objectionis*; alterum ex dignitate personæ, qui propter ea dicitur *personalis*; & assertur primum valorem non fuisse infinitum, nec conseruent æqualem in omnibus actionibus Christi, sed majorem vel minorem, juxta maiorem vel minorem excellentiam objecti talium actuum; secundum verò, utpote simpliciter infinitum, fuisse æqualem, imò & unicūm in omnibus actionibus & passionibus Christi. Pariter ergo gravitas personalis competens peccato mortali ex maiestate Dei offensæ, simpliciter infinita, æqualis est in omni peccato mortali; gravitas autem ejus ex aliis capitibus sumpta, major aut minor est, iuxta inæqualitatem malitia derivata ex illis.

ARTICVLVS VI.

Vtrum quilibet homo in primo instanti usus rationis teneatur sub mortali ad Deum se convertere, subindeque peccatum veniale cum solo originali esse non posse?

S. I.

Quibusdam præmissis, prima difficultas resolvitur.

^{174.} NOTANDVM primò: Quod cùm ratio significet intellectum, in quantum est vis ad discurrendum, puerum pervenire ad usum rationis, nihil est aliud quām ipsum pervenire ad eum statum, in quo habeat facultatem expeditam ad discurrendum, & discernendum inter bonum & malum morale: Hæc verò facultas nunc censetur pueris inesse, quando male agendo se abscondunt, aut erubescunt; potest enim contingere pueros sibi cibos querere & præparare, & sibi ædificare domos, coacervando lapides, ligna, & similia, qui tamen in genere morum nullo valent discursu, aut discretione.

Notandum secundò: Quod quando querimus, an puer in primo instanti usus rationis teneatur ad Deum se convertere? nomine instantis usus rationis à nobis rion intelligitur aliquod unum instans physicum & omnino indivisibile, sed tota illa duratio, quā homo indiger ad discernendum inter bonum honestum, & bonum delectabile aut sensibile, & ad deliberandum quodnam ex prædictis bonis sit amplectendum: quæ duratio, quia regulariter brevissima est, totaque exiguita ad primum rationis usum plenè exercendum, moraliter dicitur unum & primum instans, quamvis physice verum tempus, adeoque plura instantia includat. Porro hæc duratio, siue instans morale in aliquibus est brevius, in aliis verò latius, juxta celeritatem & acumen ingenii, uniuscujusque, & juxta diversam complexionem, & organorum ubi sensus interni resident dispositionem: Nam ratione illorum quibusdam citius, quibusdam verò tardius datum est discurrere, & prædictam deliberationem compleere: Sicut etiam ratione earumdem dispositionum quibusdam datum est citius, quibusdam tardius, ad rationis usum & discretionis annos pervenire.

Notandum tertio, duplēm dari posse conversionem in Deum; unam explicitam & formalē, quæ consistit in actu dilectionis Dei cogniti ut talis per fidem, aut per lumen naturale rationis: aliam solum implicitam & virtualem, quæ fit per propositum sequendi in omnibus bonum honestum, seu per amorem boni honesti ut sic, in quo Deus, ut hujus boni author & finis, virtualiter & implicitè continetur.

Ad plenam ergo & perfectam proposita difficultatis resolutionem, duo hic discutienda sunt: Unum, an puer cùm primò pervenit ad usum rationis, teneatur ex præcepto naturali se convertere in Deum? Alterum, qualis debeat esse illa conversio, an explicita & formalis, vel implicita solum & virtualis? Nam licet omnes discipuli D. Thomæ convenient in statuenda obligatione conversionis in Deum, seu dilectione

nis Dei pro primo instanti usū rationis, non A tamen eodem modo hujusmodi obligationem & dilectionem declarant: sed adhuc inter eos vertitur dubium, an ad illam adimplendam exigatur amor Dei formalis & explicitus, an verò sufficiat implicitus & virtualis, contentus in ipso amore boni honesti in communi? Capreolus enim & quidam alij, attentes quod hæc conversio, sive ordinatio sui in debitum finem, secundum quod à S. Doctore ponitur, est dispositio ad justificationem (ait enim S. Thomas hic art. 6. quod si puer ad usum rationis perveniens, seipsum ordinaverit ad debitum finem, per gratiam consequetur remissionem originalis peccati) existimant eam explicitè & formaliter ad Deum ut authorem supernaturalem debere terminari. Alij verò cum Cajetano, considerantes qua & quanta sint requisita ad conversionem in Deum ut finem supernaturalem, eaque puero in primo instanti rationis cōvenire non posse, rigorofam nimis hanc Capreoli sententiam judicant, & hanc ordinationem seu conversionem reducant ad conversionem in bonum honestum, in quo, ut dicebamus, implicitè & virtualiter continetur conversio in Deum ut finem ultimum. Pro resolutione prime difficultatis.

178. Dico primò, teneri omnino puerum, quam primum ad usum rationis pervenerit, sive in primo instanti morali usū rationis, convertere se ad debitum finem, eo modo quo potest. Ita D. Thomas hic art. 6. & omnes ejus Discipuli, nullo excepto: Tam clarè enim & tam firmiter in hac questione S. Doctor loquitur, & tam frequenter inculcat istam sententiam, ut meritò à Thomistarum classe eum rejecendum putem, qui ab ejus vestigiis hac in parte recesserit. Eandem sententiam tenet Abulensis super cap. 25. Matth. qu. 749. Dionysius Carthusianus in 2. distin. 28. Vincentius Bellocensis in speculo morali, Nauvarus in manuali cap. 11. 10m. 7. Toletus lib. 4. Summa cap. 9. num. 9. Vega in Trident. lib. 9. cap. 42. & plures alij, quos referunt Carmelitæ Salmanticenses disp. 20. dubio.

179. Probatur primo conclusio: Statim atque lex aliqua alicui sufficienter promulgata est, tenetur eam acceptare, & illi se subjicere; v. g. cùm primò proponitur alicui lex Evangelica, ipseque veritatem talis legis sufficienter agnoscat, tenetur amplecti illam, & propone vivere secundum ipsam, saltem in communi; & nisi ita faciat, mortaliter peccat, ut satis communiter docent Theologi in tractatu de legibus: Sed homini in primo instanti morali usū rationis, per dictamen synderesis, & lumen naturale rationis intimatur à Deo lex naturalis, dictans bonum honestum esse secundum, & præferendum utili ac delectabili: unde S. Patres, præsertim Cyrilus, ilud Joan. 1. Illuminat omnem hominem venientem in hunc mundum, intelligunt de illuminatione in primo instanti usū rationis, in quo homo dicitur tunc in mundum venire, quia tunc primò incipit vivere ut homo: Ergo in eo instanti tenetur homo tali legi se subjicere, & delibere sequi bonum honestum & rationi consonum; quod est virtualiter & implicitè in Deum se convertere, ut notabili tertio ostendimus.

180. Confirmatur: Cùm Deus primò hominem prædicto modo illuminat, ostendendo ei suam legem naturalem, quasi notificat illi dominium morale quod habet in ipsum, sumitque possessionem humanæ voluntatis, quæ ex tunc ipsi debe-

tur: Ergo tenetur ex tunc ipsa voluntas amplecti talē legem, & ejus obedientiæ se submittere; & non enim sine hac submissione possidetur moraliter à Deo, neque Deus suum morale dominium in eam exercet: si autem talis submissio per electionem boni honesti, seu per propositionem vivendi secundum rectam rationem, & secundum ejus dictamen, ut ex supra dictis patet: Ergo in primo instanti usū rationis homo tenetur, implicitè saltem, se in Deum convertere, & domino illius se subjicere, deliberando sequi bonum honestum & consonum rationi.

Confirmatur amplius: Angelus adstrictus fuit B præcepto diligendi Deum, & convertendi se in illum, in primo instanti sua libertatis, quod fuit secundum ipsius creationis, & correspontet primo nostro instanti morali: Ergo etiam nos tenemur in hoc nostro instanti similem dilectionem elicere, & in Deum nos convertere, eo modo quo in illa ætate sumus capaces, id est explicitè, vel implicitè, secundum illuminationem quæ tunc nobis datur à Deo; utpote cùm eadem ratio utrobique militet, nempe quod omnis creatura rationalis, ubi plene exercet dominium sua voluntatis, & agit ut omnino libera, tenetur se suo Creatori submittere, & primum amorem, velut primum voluntatis fructum illi consacrare. Et sànd rationi valde consentaneum est, ut Deus talis creature auctor, pro creationis beneficio exigat ab illa ex tunc hujusmodi penitentem, ut que primitias libertatis à se creatæ sibi consecrari expositulet; sicut olim in lege Mosaïca præcipiebat sibi offerri: omnia primogenita animalia, & omnium frugum primitias.

Probatur secundo conclusio ratione quam insinuat S. Doctor hic art. 6. & fusè ibidem expedit Cajetanus. Id quod primò occurrit homini, primum usum rationis habenti, est delibere de seipso, hoc est ad quem finem se squalque actiones sit ordinatus: Ergo tunc tenetur elicere aélum, quo proponat sequi bonum honestum & rationi consonum, quod est se convertere implicitè in Deum hujus boni authorem & finem, ut notabili 3. expoluimus. Consequentia manifesta videtur: Quia si homo tunc delibaret ad quem finem se squalque actiones ordinet, tenetur se, squalque operationes, in bonum naturæ rationali, ut talis est, & prout à brutis distinguuntur, convenienter, referre & ordinare: Sed bonum consonum naturæ rationali ut tali, est bonum honestum, non autem bonum delectabile; cùm istud magis naturæ animali quam rationali conveniens sit; unde Seneca Epist. 94. Cur, inquit, mihi voluptatem nominas? hominis bonum quero, non pecudis aut bellus, quibus venter laetior est, & ad percipiendas corporis voluptates aptior? Ergo si homo in primo instanti usū rationis de seipso delibernet, & se squalque actiones in aliquem finem ordinet, tenetur ordinare in bonum honestum, & oppositum malum respire. Antecedens autem, in quo est difficultas, sic probatur à Cajetano. Cùm finis Cui omnium concupiscentiarum sit ipse homo (amicabilis enim quæ sunt ad alios, veniunt ex amicibili ad se, ut ait Aristoteles 9. Ethic. cap. 4.) oportet quod amor quorūcumque concupiscentiarum supponat amorem sui ipsius: nam sicut cognitio principiorum presupponitur ad cognitionem conclusionum; ita amor finis est prior amore eorum quæ sunt ad finem: Ergo etiam delibratio circa quæcumque concupiscentiarum, presupponit

DE PECCATO MORTALI ET VENIALI.

497

ponit in homine deliberationem circa seipsum; sique manet, id quod primò occurrit homini habenti primum usum rationis, esse deliberare de seipso.

183. Dices primò, cogitationem primò occurrentem homini in primo usu rationis, non esse de seipso, sed de discernendo inter bonum & malum oppositum.

Sed contra: Venire ad usum rationis, non est hominem discernere inter bonum & malum in abstracto, sed relativè ad seipsum, discernendo quid sit bonum & malum sibi tanquam fini Cui: arque ita optimè stat, quod quia homo est finis aliorum, sibi etiam primò occurrat in illo instanti, tanquam is cui sit bonum prosequendum.

184. Dices secundò: Si est finis aliorum: Ergo primum quod sibi occurrit, non est deliberare de seipso; cum deliberatio non sit de fine, sed de medii.

Sed contra: Licet homo sit finis aliorum extra se, non tamen est finis ultimus, sed intermedium, & per consequens se habet ut medium respectu Dei, qui est finis simpliciter ultimus omnium creaturatum: unde ex quo homo est finis aliorum, sibi primò occurrit; ex quo verò non est ultimus finis, sibi primò occurrit deliberare de se in ordine ad ultimum finem.

185. Probatur tertiodì conclusio: Datur præceptum naturale diligendi Deum super omnia, & nos convertendi in illum, ut ex pluribus Scripturæ locis colligitur, præsertim ex illo Zachariæ 1. *Convertemini ad me, & ego convertere ad vos:* quod præceptum, cùm sit affirmativum, non obligat semper pro semper, sed pro aliquo determinato tempore, ut de præceptis affirmativis communiter docent Theologi: Atqui non potest aliud tempus magis proportionatum & conveniens oblationi talis præcepti assignari, quam primum instantis morale usus rationis: Ergo in illo homo tenetur ad Deum se convertere, saltem implicitè, proponendo sequi bonum honestum & rationi consonum, ut dicemus conclusione sequenti. Major patet, Minor verò probatur multipliciter. Primo quia, ut supra dicebamus, in primo instanti usus rationis lex naturalis, mediante synderesi & lumine naturali, intimatur homini, subindeque tunc primò incipit obligare quantum ad omnia ipsius præcepta, inter quæ primum ac præcipuum est præceptum diligendi Deum super omnia, & nos convertendi, in illum.

186. Secundò probatur Minor: Homo in illo primo instanti ingreditur moraliter in mundum, & viam vitæ rationalis & humanae incipit; unde sicut ille qui incipit aliquid longum iter, ex dictamine rectæ rationis & prudentiæ, tenetur initio illius, aliquem terminum sibi præstituere, ita & homo in primo illo instanti debet certam operandi regulam, certumque & fixum scopum, quod suas operationes ditigat, sibi proponere, nempe honestè & conformiter ad dictamen rectæ rationis vivere; alias maximo errandi in decursu vita periculo se exponet, cùm parvus error in principio sit maximus in fine. Usque plures Doctores ad nostrum propositum explicant illud Psalmistæ: *Dominus custodiat introitum tuum, & exitum tuum*, de primo & ultimo instanti humanae libertatis, in quibus præcipue indiget humana fragilitas à Deo custodiari. Illud ergo instantis morale est tempus maximè oportunum & necessarium ad observantiam prædicti præcepti. Quam rationem insinuat S. Thomas qu. 28. de verit. art.

A 3. ad 4. ubi sic ait: *Cum quilibet teneatur peccatum vitare, & hoc fieri non posit, nisi præstituto sibi debito fine, tenetur quilibet, cùm primò suæ mentis est compos, ad Deum se convertere, & in eo finem constitueret.*

Tertiò Minor probatur: Præceptum diligendi Deum super omnia est primum quod continetur in lege, juxta illud Matth. 22. *Hoc est maximum & primum mandatum*; unde præceptum præceptorum dici solet, quia cetera omnia illud supponunt, & in eo radicantur: adimplitioni autem primi præcepti debitum est primum tempus capax talis adimplitionis, quod est primum instantis morale usus rationis & libertatis. Accedit quod tale præceptum est finis omnium præceptorum, & totius legis, juxta illud 1. ad Timoth. 1. *Finis præcepti est charitas*: finis autem licet in executione sit posterior, in amore, tamen & intentione debet esse prior, utpote propter quem cetera diliguntur: debet igitur præceptum diligendi Deum, & se convertendi in illum, in primo instanti usus rationis acceptari & adimpleri.

Denique probatur eadem Minor: Omnia alia tempora, pro impletione hujus præcepti ab Adversariis assignata, non sunt ita apta & convenientia, sicut primum illud instantis morale usus rationis, ut patet ea referendo ex Tamburino lib. 2. in Decal. cap. 3. §. 2. num. 1. ubi decem Theologorum sententias recenset: *Primum tempus (inquit) quod aliqui assignant, est initium usus rationis: secundum finis vita: tertium, tota vita indeterminat sumpta, ut saltem semel in ea ametur Deus: quartum, omnes dies festivi, in quibus debemus Deo specialiter vacare: quintum, tempus quo adulus suscipit baptismum: sextum, tempus quo quis suscipit Eucharistiam: septimum, quando forte sumitur martyrum: octavum, quando magnum à Deo accipit beneficium: nonum, quando audis aliquem contra Deum blasphemantem: decimal, quando gravi urgeris tentatione, præsertim odij Dei, cum periculo consensus, nisi ad Deum per amorem te convertas. Pater, inquam, omnia illa tempora non esse ita apta & convenientia ad implendum præceptum dilectionis, sicut initium usus rationis. Quod enim dicitur de instanti mortis, communiter reprobatur: quia cùm præceptum dilectionis Dei traditum sit ad rectam vitæ humanæ institutionem, per relationem operationum nostrarum in Deum tanquam in ultimum finem, & ad conciliandam conservandamque amicitiam cum illo, rationi dissonat ut in solo vitæ exitu obliget, totumque vitæ spatium extra talentum obligationem sit. Unde Dominicus Soto lib. 2. de justitia & jure qu. 3. art. 10. loquens de hac sententia, sic ait: *Si dixeris facies esse semel in vita, idque in articulo mortis, præceptum dilectionis Dei implere, profectò longè à natura præcepti aberras: cùm enim præceptum hoc ceterorum omnium sit preambulum, & ut ait Paulus, finis (nam finis præcepti est charitas) ridiculum esset dicere, quod licet transfigere totam vitam antequam nos obliget. Similiter alia sententia, quæ totum tempus vitæ indeterminat assignat, communiter rejicitur, eo quod cuilibet præcepto determinato certum & determinatum tempus, in quo obliget, assignari debeat: unde hic modus dicendi difficultatem non solvit, sed dissimulat. Alia etiam sententia, excepta ultimâ, omni probabilitate careat: cùm elicere actum charitatis temporibus ab illis authoribus designatis (puta diebus festiis, cùm debet suscipi)**

Rer.

Tom. III.

Baptismus, vel Eucharistia, vel dum instat tempus martyrij, aut magnum aliquod beneficium a Deo recipitur) non sit praeceptum, sed duntur consilium.

^{189.} Solum potest esse difficultas circa ultimam sententiam, quam docet Thomas Sanchez lib. 2. summa cap. 35. ubi rejectis aliis dicendi modis, docet praeceptum charitatis tunc solum obligare, cum graves odij Dei tentationes instant, & periculum illis succumbendi adest, nisi tentatus actum amoris Dei elicit. Sed hunc etiam dicendi modum insufficientem esse demonstrant Salmantenses loco supra citato, num. 5. Primo quia (inquit) obligatio ad actum, quae est praecise ratione temptationis causa occurrentis & urgentis, non est obligatio per se, sed per accidens; sicut per accidens & non per se est quod talis tentatio tunc occurrit, & alia vi superari non possit: tempus autem quod querimus non est illud, in quo praeceptum dilectionis Dei urgeat per accidens, sed in quo obliget per se, quia certum est assignandum esse aliquod tempus hujus per se obligationis. Secundo quia talis obligatio debet esse communis omnibus adultis, & omnes illos constringere, sicut ipsum praeceptum commune est, & omnibus imponitur: Sed illa occasio in qua urgent graves odij Dei temptationes, & periculum illis succumbendi, non est communis omnibus adultis; plurimi enim sunt, qui toto vita tempore nullis hujusmodi temptationibus vexantur: Non igitur hac vi assignatur sufficiens tempus praedictae obligationi.

^{190.} Ex his intelliges, D. Thomam non adiunvensse aut excoitasse novum praeceptum, dum puerum pervenientem ad usum rationis assertum teneri ad se convertendum in Deum, sed solum determinasse & declarasse tempus, quo primum & antiquissimum omnium mandatorum, scilicet charitatis praeceptum, obligare incipit, nempe primum instans morale usus rationis & libertatis; in quo instanti magis hoc praeceptum urgeat, quam alia quacunque occasione vel tempore assignabili, quis non videat? An forsitan periculosa navigationem tunc homo non aggreditur? Vel parum refer recentem testam bono liquore & odore imbueri? Vel tunc non magnum instat temptationis periculum, quando Adversarius noster Diabolus circuit quarens tenellam orem quam devoret? ait eleganter illustrissimus D. de Marinis Avenionensis Archiepiscopus. Nec obstat, si hujus artatis imbecillitatem alleges, quam non videtur ad talēm obligationem subeundam idonea: nam facilius est pueru talēm conversionem seu dilectionem in illo instanti elicere, quando nulla adest indispositio ex aliquo peccato personali relata, quam eo transacto, ubi talis indispositio possit voluntatem retardare. Unde suavitius egisse videtur divina providentia, restrainingo tale praeceptum ad primum instans, quam si ulterius illud distulisset. Addo quod puer ad annos discretionis pervenientes, non tenetur se convertere in Deum, nisi juxta illuminationem & notitiam de Deo qua tunc ipsi communicatur; ita ut si notitia Dei fuerit explicita, ad amorem explicitum; si implicita, ad implicitum tantum teneatur, ut patebit ex dicendis conclusione sequenti.

^{191.} Dico secundum: Quamvis praeceptum dilectionis Dei omnes ad rationis usum pervenientes per se obliget ad formalem & explicitam in Deum,

A ut authorem & finem supernaturalem, conversionem; per accidens tamen multi excusantur ab impletione hujus praecepti, quantum ad amorem explicitum Dei, etiam ut finis naturalis: nemo autem excusatur ab ejus obligatione, quantum ad amorem Dei implicitum, in amore boni honesti in communi virtualiter contentum.

Hac conclusio conciliat sententias Capreoli & Cajetani supra relatas: nam quando Capreolus assertit ad impletionem predicti praecepti requiri amorem explicitum Dei, etiam ut authoris & finis supernaturalis, loquitur de obligatione quae per se oritur ex vi praecepti: quando vero Cajetanus & alij Thomistae communiter docent ad ejus adimplitionem sufficere amorem Dei ut finis naturalis, implicitè contentum in ipso amore & elezione boni honesti, & in proposito vivendi secundum rectam rationem, loquuntur de eo quod per accidens in multis accedit, qui propter ignorantiam invincibilem ab obligatione predicti praecepti, quantum ad amorem Dei explicitum, excusantur. Hoc praemiso.

Probatur prima pars conclusionis: Præceptum diligendi Deum obligat omnes homines, ex quo habent rationis & libertatis usum, seu in primo instanti morali usus rationis & libertatis, ut præcedentis conclusione ostendimus: Sed supposita elevatione naturæ humana ad ordinem & finem supernaturalem, tale præceptum habet amorem formalem & explicitum. Dei ut authoris & finis supernaturalis, cum illum ut talen per fidem cognoscamus: Ergo per se & ex vi præcepti dilectionis Dei, puer ad annos discretionis perveniens, tenetur ad amorem explicitum & formalem Dei, ut authoris & finis supernaturalis.

Confirmatur: Supposito quod amor explicitus Dei ut authoris supernaturalis aliquando sit debitus, ut omnes supponunt, rationes a nobis factæ sufficienter convincunt, opportunissimum tempus talis obligationis esse prædictum instantis, nullumque succedere in toto vita spatio magis vel aquæ opportunum: Ergo &c. Dixi autem, supposita elevatione naturæ humana ad ordinem supernaturalis: quia si homo sine tali elevatione, & in statu naturæ pura conderetur, præceptum diligendi Deum solum comprehendenteret amorem ejus naturalem, & ad supernaturalem nequamquam se extenderet.

Quod autem multi ab obligatione hujus præcepti, quantum ad amorem Dei explicitum, per accidens excusentur, ut assertit secunda conclusionis pars, manifestum est: quia multi sunt, qui in primo instanti usus rationis non cognoscunt Deum explicitè, etiam ut authorem naturalis, sed laborant pro tunc ignorantia ejus invincibili, ut pater in illis qui sunt educati in sylvis, vel apud barbaras nationes, qui nihil unquam audierunt aut cognoverunt de Deo: Sed nemo potest explicitè amare quod explicitè non cognoscit, cum nihil sit volitum, quin præcognitum: Ergo multi propter ignorantiam invincibilem excusantur ab impletione predicti præcepti, quantum ad amorem explicitum Dei, etiam ut finis naturalis, & plures adhuc, quantum ad amorem Dei ut finis & authoris supernaturalis. Non tamen excusantur omnes: quia multi sunt, ex iis præcertim qui inter Catholicos & animalium salutis studiosos nutriuntur, qui antequam ad annos discretionis perveniant, plura audiunt & apprehendunt de Deo, & de arti-

culis nostræ fidei, quibus sufficienter instruuntur, ut in primo instanti morali usus rationis & libertatis, per irradiationem luminis fidei vel synderesis, efforment verum & explicitum de ipso Deo iudicium, etiam supernaturale, ex quo ad similem ejus amorem expressum & formalem incitentur; qui proinde non excusantur ab impletione prædicti præcepti, quantum ad amorem explicitum Dei, etiam ut authoris supernaturalis. Unde D. Thomas h[ic] art. 6. ait quod puer ad annos discretionis perveniens, tenet Deum diligere, secundum quod in illa aetate est capax: quia solum ad id tenet juxta notitiam quæ tunc ipsi communicatur, atque adeo si notitia fuerit explicita, tenebitur ad explicitum amorem; si vero implicita, ad implicitum: sicut etiam si habeat notitiam Dei ut finis duntaxat naturalis, solum adstringetur ad hujus amorem; si vero ut finis supernaturalis, tenebitur quoque ad amorem istius finis.

^{196.} Tertia pars conclusionis, quod scilicet nemo excusetur ab obligatione prædicti præcepti, quantum ad amorem Dei implicitum, in amore boni honesti in communi virtualiter contentum, probata manet ex dictis assertione præcedenti: ibi enim ostendimus, omnibus hominibus in primo instanti morali usus rationis & libertatis, manifestari per dictamen rationis, seu lumen synderesis, bonum honestum, & obligationem amplectendi ipsum, sequendique legem naturalem, quæ tunc quoad prima ipsius præcepta & principia ostenditur & intimatur; neque censetur completum tale instantis, quo usque totum hoc cum plena advertentia & deliberatione innoteat. Unde Cyrillus, ut supra vidimus, hunc locum Joannis, *Iluminat omnem hominem venientem in hunc mundum*, intelligit de illuminatione, seu manifestatione boni honesti, que fit in primo instanti usus rationis, in quo Deus per lumen naturale intellectus, & per dictamen synderesis, movet & excitat hominem (qui in illo instanti moraliter ingreditur in hunc mundum, & viam vita moralis seu rationis incipit) ad vivendum honeste, & conformiter ad rectam rationem. In quo etiam sensu Chrysostomus homil. 60. in Matth. hæc verba Matth. 20. *Exitio primo manè conducere operarios in vineam suam*, interpretatur est: nam per primum manè intellectus initium dici humanae libertatis, quod est primum instantis usus rationis, in quo Deus conductus operarios in vineam suam, quia tunc homines ad recte & honeste vivendum existat.

^{197.} Denique hæc veritas adeo clara & manifesta est, ut ipsi etiam Ethnici eam agnoverint: nam apud Latinum Poëtam decantatam habemus litteram Pythagoræ discrimine sciam bicorni, quæ humanae vita speciem præ se ferre videtur, & ad rationis usum venienti pueru utramque viam virtutis & vitij demonstrare. Constat etiam ex ipsis antiquorum fabulis, quod puerulo Herculi obviam ierunt duas matrone, virtus & voluptas, & unaquæque ipsum allucere conata est. Similia apud Authores prophanos invenimus, que connaturalitatem dictaminis & præcepti à synderesi significat, i homini ad usum rationis quam primum pervenienti, manifeste declarant. Ergo nullus ab adimplitione prædicti præcepti, quantum ad amorem Dei implicitum, in amore boni honesti virtualiter inclusum, ratione ignorantiae invincibilis excusari potest; licet multi

ab adimplitione præcepti dilectionis, quantum ad amorem Dei formalem & explicitum, per accidentem excusentur.

S. II.

Solvuntur objectiones.

^{198.} CONTRA præcedentes assertions plura objiciunt Recentiores, quæ soluta manent ex dictis. Dicunt in primis præceptum illud se convertendi in Deum in primo instanti usus rationis, neque in Scriptura, neque in SS. Patribris contineri, subindeque gratis & sine ullo fundamento esse à D. Thoma excogitatum. Addunt nimis durum videri, astringere pueros præcepto adeo oneroso in illa adhuc tenera aetate, in qua plerique nullani Dei notitiam habent. Subiungunt, nullum esse virtutis doctum & timorata conscientia; qui sollicitus sit an impleverit hoc præceptum, & qui de ejus omissione in confessione se accuset. Dicunt etiam, sequi ex nostra sententia; quod pueri baptizati ferè semper amittant gratiam, dum primum perveniunt ad usum rationis; cum nulli vel pauci sint, qui tunc adimplent tale præceptum. Denique dato quod tale præceptum existeret, parvuli ad usum rationis pervenientes poterunt ignorantia illius invincibili laborare, cum multi viri docti, opposita sententia adherentes, illud invincibiliter ignorent, dum probabiliter non adesse opinantur: Ergo ratione talis ignorantia poterunt ab ejus impletione excusari.

Hæc sunt præcipua adversa sententia fundamenta, que, ut dixi, soluta manent ex dictis. Ostendimus enim præceptum illud, de quo agimus, non esse novum, nec à D. Thoma excogitatum, sed maximum habere fundamentum in Scriptura, & SS. Patribris: præsertim cum Scriptura & Patres toties nobis enuntiant præceptum diligendi Deum super omnia, in quo hoc implicitè continetur; immo ab eo non distinguitur, sed solum determinat tempus in quo illud incipit obligare, ut supra annotavimus. Quod si Theologorum disputationi, arbitrio, & judicio relinquatur determinare tempus, in quo obligat præceptum charitatis; indeque factum sit ut nullus ex Theologis vel etiam Casuistis inventiatur, qui suam sententiam quoad hoc prudere non audeat, ut supra vidimus apud Tamburinum, qui decem varias Authorum opiniones circa hoc recenset: cur similiter non licebit Theologorum Principi & Coriphæ, suam circa hoc proferre sententiam, ac determinare tempus quod tale præceptum positivum obligat, vimurum primum instantis morale usus rationis, quo (ut supra ostendimus) nullum in toto vita decursu magis vel aequo opotinum dati potest?

Paret etiam ex supra dictis, præceptum istud non esse nimis onerosum & asperum; cum per illud puer solum tenetur se convertere in Deum eo modo quo potest, seu ut loquitur S. Doctor, secundum quod in illa aetate est capax, & juxta notitiam quæ tunc sibi communicatur, ut in secunda conclusione fuse declaravimus. Addo quod tunc pertinet ad Authorum natura, manifestare & intimare hujusmodi obligationem, tanquam præceptum omnino primum, & initium carcerorum præceptorum, totiusque ordinis practici, ut inde homo per deliberationem & discursum reliqua præcepta naturalia deducat.

Rer. ij.

Tom. III.

Ad id quod additur de viris doctis & timoratæ conscientiæ, dicendum est plures ex illis violationem hujus præcepti non examinare aut confiteri, quia cum Adversariis probabilius existimant non daritale præceptum; quilibet autem potest tutæ conscientiæ sequi illam sententiam quam judicat probabiliorem, licet opposita sit tñtor, ut in dissertatione Theologica de probabilitate ostendimus. Addo cum Cajetano, sufficere in communi confiteri de occultis, intendendo de omnibus.

Ad aliud quod subjungitur, neganda est sequentia: nam multi sunt pueri inter fideles nutriti & baptizati, ac probis moribus imbuti, qui re ipsa tale præceptum adimplent, & ad Deum expliciter, vel saltem implicitè, in instanti morali usus rationis se convertunt. Quod Cajetanus hic art. 6. ex ipsa natura charitatis in baptismō infusa colligit: *Videtur mihi (inquit) quid quia amor Dei non est otiosus, charitas infusa baptizato infantii exit in actu in primo actu naturali, sicut de Angelis dictum fuit. & quod statim occurrenti seipso ut liberabili, infusa fides liberandi sollicitudinem foreat, ad presentandum bonum honestum cooperando, inclinando ad hoc intellectum, & consequenter charitas inclinet appetitum ad honestum prosequendum. Et licet hoc videatur verum ut in pluribus, non oportet tamen sic esse in omnibus, non solum propter libertatem, sed propter complexionem, & malam assuetudinem ante annos discretionis. Vnde fit quod pars sensitiva magis moveat ad assueta dilectionib[us] mala, quam fidis & charitas ad honestum. Propter quod nota parvi refert, ut assuecat puer ad audienda spiritualia & honesta: determinatur enim habitus fidei infusa ex propositis ex auditu, & charitas itum sequitur.*

Denique ad illud quod dicitur de ignorantia invincibili prædicti præcepti, respondetur quod licet aliqui viti docti tale præceptum invincibiliter ignorare possint, non tamen pueri ad primum instantis discretionis pervenientes. Ratio discriminis est, quia pueris ad instantis discretionis pervenientibus illud ab Authorc natura pro illo instanti practicè & in actu exercito propinatur, mediante dictamine synderesis, ita clare & evidenter, ut non relinquitur eis locus dubitandi: semel autem hac propositione ab authorc natura facta, & cum tali instanti moraliter aut paulò post finita, opus est ad novam illius præcepti cognitionem acquirendam, ut ratiocinatione & discursu, qui à passionibus, vel rationibus dubitandi aliunde insurgentibus sepe obnubilatur. Ex quo fit quod non solum plures viri docti, de existentia illius præcepti dubitent, sed etiam quodd nos ipsi, qui veram tenemus sententiam, minori firmitate & certitudine ei modò assentiamus, quam in instanti morali usus rationis: tunc enim cognitio naturalis, utpote innixa evidenti lumini, omni formidini & rationi dubitandi locum præcludebat; modò vero discursus, per quem eandem veritatem assequimur, deficiente illo lumine, seu dictamine syncretis, ab Authorc naturæ immisso, solum concludit eam ut probabilem, & cum aliqua alterius partis formidine, ut recte observarunt Salmantenses ubi supra num. 22.

¶¶¶¶¶

A

S. III.

Solvitur difficile argumentum.

Hoc argumentum potest sic breviter & clare proponi. Si quilibet homo primò pervenientis ad usum rationis teneretur se convertere in Deum, deberet ipsi dari auxilium sufficiens ad talem conversionem: Sed hoc dici nequit: Ergo nec illud. Major patet: nam obligatio inexcusabilis ad aliquem actum state nequit absque auxilio sufficienti ad illum; cùm Deus neminem obliget ad id quod est ei impossibile, & nullus peccet in eo quod vitare non potest. Minor verò, in qua est difficultas, sic ostenditur. Si quilibet homo ad annos discretionis pervenientis, habetur auxilium sufficiens, quo posset se convertere in Deum, vel illud esset quod substantiam & entitatem supernaturale, vel naturale? Neutrū dici potest: Ergo &c. Major patet, Minor quoad utramque partem suadetur. Et primò quod tale auxilium non esset supernaturale, videtur certum: Tum quia auxilia supernaturalia non dantur omnibus, sicut nec fides, cuius illuminatio tenet primum locum inter auxilia ordinis supernaturalis, ut ostendimus in tractatu de prædestinatione. Tum etiam quia si cuilibet homini ad usum rationis pervenienti datur auxilium supernaturale, ut in Deum se con- §. 4. verteret, nullus esset infidelis negativè: quod tamen est contra S. Thomam 2. 2. qu. 10. art. 2. ubi docet dari in illis hominibus, ad quorum aures prædicatio Evangelij non pervenit, infidelitatem negativam, seu ignorantiam invincibilem mysteriorum fidei. Sequela probatur: Ille dicitur infidelis negativè, qui nihil unquam audivit de mysteriis fidei, nec ullam habet cognitionem aut illustrationem supernaturalem: At si quilibet homo ad usum rationis pervenientis, habetur in voluntate auxilium supernaturale, ut posset se convertere in Deum, nullus esset qui non haberet in intellectu aliquam illustrationem & cognitionem supernaturalem: Ergo nullus esset infidelis negativè. Major patet, Minor etiam videtur certa: nam cùm voluntas in omnibus sequatur dictum intellectus, & judicium ejus practicum, repugnat quod aliqua illius affectio vel motio ad supernaturalem ordinem pertineat, nisi istius illuminatio eundem ordinem attingat, subindeque quod detur auxilium physicum supernaturale in voluntate, nisi præcedat ex parte intellectus auxilium morale, etiam supernaturale, seu aliqua illustratio & cognitione supernaturalis.

Deinde quod auxilium illud, de quo est quæstio, non possit esse entitativè & quod substantiam naturale, eadem facilitate potest ostendit: Nam (præterquam quod, ut dicimus in tractatu de gratia, homo in natura lapsa non potest ex viribus naturæ diligere Deum ut authorc & finem naturalem, dilectione efficaci, qualis debet esse amor de quo loquimur) ex hoc sequeretur, hominem ex viribus naturæ posse se disponere ad gratiam & iustificationem: Sed hoc est Pelagianum: Ergo &c. Sequela patet: nam D. Thomas hic art. 6. docet quod si puer pervenientis ad usum rationis, seipsum ordinaverit ad debitum finem, per gratiam consequetur remissionem originalis peccati: ex quo infert peccatum veniale non posse esse in aliquo cùm solo origi-

205.

Dif. i.
art. 4.

DE PECCATO MORTALI ET VENIALI.

501

nali, ut infra patebit: Ergo si puer ex solis viribus naturæ, & cum auxilio entitativè & quoad substantiam naturali, possit in Deum se convertere, seu in debitum finem se ordinare, poterit ex iisdem viribus naturæ ad gratiam justificantem se disponere.

206. Nec valet si dicas, inter illum actum, & infusionem gratiæ, mediare aliquod auxilium supernaturale, quo puer prius tempore vel natura quam justificetur, & consequatur remissionem originalis peccati, illuminatur interius à Deo de rebus fidei, & se convertit in Deum ut authorem supernaturalem; ac proinde gratiam & justificationem non correspondere viribus naturæ, & conversioni naturali in Deum, sed auxiliis gratiæ, & conversioni supernaturali. Non valet (inquit) quia ex hoc sequitur quod saltem prima illa vocatio ad fidem, & auxilium illud supernaturale, correspondent viribus naturæ, seu conversioni naturali, subinde quo facienti quod in se est viribus naturæ, Deus infallibiliter conferat saltem auxilia gratiæ: nam idem tale auxilium supernaturale, seu prima illa vocatio ad fidem, illi puero confertur, quia ex viribus naturæ se convertit in bonum honestum, & in Deum ut finem naturalem. Hoc autem communiter negant nostri Thomistæ in tractatu de gratia, ubi docent non dari certam & infallibilem connexionem gratiæ, vel auxiliorum ejus, cum aliquo actu elicito viribus solius naturæ, nihil gratiæ ibi concurrente: unde S. Thomas infra qu. 109. art. 6. ad 2. & ad Roman. 10. lec. 3. axioma illud, facient quod in se est Deus non denegat gratiam, intelligit de illo qui facit quod in se est, adjutus gratiæ auxiliis, non vero ex solis viribus naturæ. De quo plura diximus in tractatu de prædestinatione.

207. Ex his ergo patet nodus præsentis difficultatis, & quam difficile sit in Caribidum vel in Scyllam non incidere: si enim dicatur actum dilectionis Dei, ad quem omnes tenentur in instanti usus rationis, elici ex solis viribus naturæ, sequitur quod ex viribus naturæ homo possit se ad gratiam disponere. Si vero asseramus ad talem conversionem & dilectionem hominem indigere auxilio & viribus gratiæ, suppletius virium naturalium defectum, in aliud inconveniens non minus grave, & in Scyllam non minus periculosum incidimus: nam fateri tenemur non dari infideles purè negativè, nullique illuminationem interiorem de mysteriis fidei, quæ primum tenet locum inter auxilia ordinis supernaturalis, à Deo in pœnam peccati originalis denegari:

Dip. 2. art. 3. § 4. cujus oppositum docet D. Thomas loco citato, & nos in tractatu de prædestinatione fusè ostendimus.

208. Huic difficulti argumento respondent aliqui ex nostris Thomistis, auxilium quod datur cuiuscumque homini ad usum rationis pervenienti, ut se convertat in Deum, esse entitativè & quoad substantiam supernaturale. Ut autem cum hoc salvant dari infideles negativè, distinguunt duplex auxilium supernaturale; unum quod est talis ex suo objecto, cuiusmodi est illud quod datur ad credendum mysterium Trinitatis v. g. vel ad se convertendum explicitè in Deum ut authorem supernaturalem: aliud cuius entitas est supernaturalis ex modo tantum, quia non datur ad eliciendum aliquem actum supernaturalem, sed ad subveniendum infirmitatim naturæ per peccatum debilitatem, & ad reddendam illum completem potentem ad eliciendum aliquem.

A actum naturalem, quem in statu sanitatis & integritatis ex propriis viribus elicere poterat: & hujusmodi (inquiunt) est illud auxilium, quod datur homini in statu naturæ corruptæ, ad conversionem in Deum ut ultimum finem naturalem. Unde per hoc evacuate putant difficultatem argumenti propositi, & duo illa inconvenientia supra adducta devitare: ex eo enim quod tale auxilium est supernaturale ex modo, habetur quod homo ex solis viribus naturæ non potest se disponere ad gratiam sanctificantem, vel ad ejus auxilia: ex eo vero quod non est supernaturale ex objecto, state potest cum infidelitate negativa, quia illud habens non debet habere in intellectu revelationem de mysteriis fidei, vel aliquid obiectu supernaturalis cognitionem.

Hæc solutio, quam aliqui Recentiores plurimum extollunt & magnificant, sicut subtilitate non caret, ita nec difficultate. Primo quia ut aliquid dicatur quoad substantiam & entitatem supernaturale, non sufficit quod superet vires naturæ infirmæ, sed oportet quod excedat virtutem cuiuslibet naturæ inferioris ad Deum, ut docent nostri Thomistæ in tractatu de gratia: Ergo ex eo quod dilectio efficax Dei ut authoris & finis naturalis, superet vires naturæ infirmæ, & per peccatum debilitatem, non sequitur auxilium collatum puero ad annos discretionis convenienti, ad se convertendum implicitè in Deum ut in authorem & finem naturalem, esse quoad entitatem & substantiam supernaturale, sed solum esse speciale, intra ordinem naturæ.

Deinde cum specificatio actus ab objecto defumatur, difficile intelligi potest, quomodo illuminatio, data puero in instanti usus rationis, fit quoad suam entitatem & speciem supernaturalis, & nihilominus nullum objectum supernaturaliter attingat, & Deum ut finem & authorem solum naturalem respiciat.

Nec valet si dicas, quod licet lumen illud pueri in eo instanti collatum, explicitè solum Deum ut authorem naturalem respiciat, implicitè tamen tendit in ipsum ut authorem supernaturalem. Ex hoc enim manifestè sequitur, nullum dati infidelem negativè; subinde illos Authores incidere in illud inconveniens quod maximè vitare cupiunt. Sequela probatur: Sola cognitione implicita de rebus fidei, sufficit ad tollendum infidelitatem negativam: Ergo si quilibet homo ad usum rationis perveniens, habet cognitionem implicitam Dei ut authoris supernaturalis, nullus erit infidelis negativè. Consequenter patet, Antecedens probatur ex D. Thoma 2. 2. qu. 10. art. 3. ubi expressè docet Cornelius ante instructionem Petri, & nondum ei manifestata evangelij prædicatione, non fuisset infidelis negativè; quia juxta Scripturam erat acceptus Deo, & conseqüenter habebat gratiam & fidem, sine quibus impossibile est placere Deo; qui vero habet habitum fidei, non est infidelis negativè, cum infidelitas sit carentia fidei: Atqui ex eodem S. Doctore ibidem Cornelius ante talem instructionem non habebat fidem explicitam, sed tantum implicitam: Ergo sola cognitione implicita de veritatis supernaturalibus tollit infidelitatem negativam.

Confirmatur: Si Cornelius obiisset ante instructionem Petri, & ante cognitionem explicitam de rebus supernaturalibus, fuisset salvatus, quandoquidem erat justus & acceptus Deo, ut ait Scriptura: Ergo cum nulli infideli patet aditus ad

Rrr iii

regnum cælorum, verè propter solam cognitionem implicitam erat fidelis; subindeque talis cognitio omnem infidelitatem etiam negativam excludit. Hac ergo solutione rejecta:

Meliùs ac solidius respondet, quod licet auxilium efficax ad conversionem in Deum ut authorem naturæ sit entitativè & quantum ad substantiam supernaturale, non tamen auxilium purè sufficiens. Ratio discriminis est, quia auxilium efficax dat actu agere; sufficiens verò confert solum potentiam ad agendum: quamvis autem in statu naturæ lapsæ actualis conversio in Deum ut authorem naturæ nunquam ponatur sine auxilio gratiæ (eo quod talis conversio non possit stare cum originali peccato, neque istud auferri sine gratia) potentia tamen ad se convertendum in Deum ut authorem naturæ stare potest, etiam in statu naturæ lapsæ, sine auxilio gratiæ, cum solo auxilio speciali ordinis naturalis, ut communis docent nostri Thomistæ in Tractatu de gratia. Ex quo patet solutio ad primam probationem in contrarium: nam quando Thomiste docent in tractatu de gratia, hominem in statu naturæ lapsæ non posse diligere Deum ut authorem naturæ, dilectione efficaci, sine gratia, non loquuntur de potentia antecedente, &c. ab acta separata (hanc enim dicitur hominem habere sine gratia, cum solo auxilio speciali ordinis naturalis) sed de potentia consequente & applicata ad actum, seu cum illo conjuncta, qua sine auxilio efficaci ordinis supernaturalis, applicante potentiam ad agendum, stare nequit; cum repugnet hominem, in statu elevationis ad finem supernaturalem, actu & de facto se convertere in Deum ut authorem & finem naturalem, nisi etiam simul se convertat in ipsum ut finem & authorem supernaturalem, ut in eodem tractatu de gratia ostendemus.

Ex quo etiam patet solutio ad secundam probationem: cum enim fieri nequeat, quod in adimplitione actuali supra dictæ precepti (qua secundum se & divisi considerata fieri posset viribus naturæ) non admisceantur de facto auxilia supernaturalia disponitiva ad gratiam, non sequitur hominem ex solis viribus naturæ se disponere ad gratiam, vel gratiam justificationis, aut aliqua supernaturalia auxilia, dari infallibiliter facient quod est in se ex solis viribus naturæ, sed solum ex auxilio gratiæ. Unde recte S. Thomas locis citatis docet, axioma faciente quod in se est, Deus non denegat gratiam, debet intelligi de illo qui facit quod in se est, adjutus gratiæ. Et hic art. 6. ait quod si puer perveniens ad usum rationis, seipsum ordinaverit in debitum finem, per gratiam consequetur remissionem originalis peccati: nunquam enim contingit quod puer ad annos discretionis perveniens seipsum ordinet in debitum finem, & convertat in Deum ut authorem naturæ, nisi etiam seipsum ordinet & convertat in Deum ut authorem & finem supernaturalem, & mediante ista conversione se disponat ad gratiam sanctificantem, qua remittit seu delet peccatum originalis; unde sequitur peccatum veniale non posse in aliquo cum solo originali reperi, ut s. sequenti patet.



Alia difficultas expeditur.

Dico tertio: Impossibile est quod peccatum veniale sit in aliquo cum solo originali. Ita S. Thomas codem art. 6. sèpè citato, ubi id probat duplice ratione.

Prima, quæ habetur in argumento *sed contra*, sumitur ab inconvenienti, quod sequeretur ex adversa sententia. Si enim aliquis cum veniali & originali decederet, non esset locus in quo puniri posset: nam in limbo puerorum pro solo originali puniuntur homines: ad purgatorium non descendunt nisi animæ quæ in gratia decadunt, ut illo igne purgata in calum consendant: ad infernum verò propter solum peccatum mortale actuale homines detruduntur.

Nec valet quod aliqui dicunt, pertinere ad divinam providentiam res ita disponere, ut non permittat eum qui habet peccata venialia cum solo originali, mori in tali statu, quouique aut justificetur, aut aliquod mortale committerat: sicut non permettit peccatorem prædestinatum mori, quousque à peccato mortali exeat, neque justum reprobum, quousque in illud incidat. Non valet (inquam) nam præterquam quod hoc videtur gratuitum, & irridetur a pluribus, non evacuat vim argumenti, nec vitat prædictum inconveniens: illud enim non sit in eo tantum quod anima cum peccato originali & veniali ab hac vita discedens, non inventat tunc receptaculum in futura, in quo puniri possit; sed etiam in eo quod derur aliquis status hominis in hac vita, cui in futura nullus locus corresponeat, ad quem homo ipse secundum præsentem justitiam, & juxta merita in quibus inventur, sit destinatus; quod sane absurdissimum est. Nam si inter alios status hujus vitæ, quos de lege communis possibiles admittimus, nullus est qui sibi non vendicet certum locum in futura, ad quem quotquot habent talem statum, ex quo sunt in illo, adeoque ante mortem, destinantur; eur dicemus dabilem esse illum quem Adversarij volunt, nem homini habentis peccatum veniale cum solo originali, si in eo existentibus, quatenus in eo sunt, nullus locus in altera vita corresponeat, ad quem secundum præsentem justitiam destinantur?

Quod potest confirmari & illustrari exemplo, quod ab ipsis Adversariis adducitur. Licet enim ad divinam providentiam pertineat res ita disponere, ut non permittat peccatorem prædestinatum mori, antequam gratiam recuperet, nec justum reprobum, antequam eam amitterat; tamen dum sint in hac vita, unusquisque ratione status in quo est, habet aliquem locum sibi correspondenter in alia, in quo puniri aut præmiari possit: nam justus quandiu talis permanet (sive alias prædestinatus, sive reprobus sit) ex vi statutus, & secundum præsentem justitiam, destinatus est purgatorio vel celo: peccator verò (sive alias reprobus, sive prædestinatus) dum peccator est, & secundum præsentem justitiam, inferno: Ergo similiter, esto quod spectet ad divinam providentiam res ita disponere, ut non permittat eum, qui habet peccata venialia cum solo originali, mori in tali statu; si tamen hic status sit possibilis, debet in eo existentibus, quatenus in eo sunt, ac secundum præsentem justitiam, assignari in alia vita aliquis locus, qui ipsi

Art. 1. correspōdeat: unde cū ille assignari nequā eat, ut ostendimus, non leve argumentū est, hūjusmodi statum esse impossibilem, & peccatum veniale non posse in aliquo cū solo originali reperiri.

214. Secunda ratio, quam S. Doctor habet in corpore ejusdem articuli, potest sic proponi. Si id homine posset reperiri peccatum veniale cū solo originali, vel hoc ei conveniret ante primum instans usūs rationis & libertatis, vel in ipso instanti, vel immediate post illud instans? Nullum ex his dici potest: Ergo &c. Major patet à sufficienti enumeratione: Minor verò probatur quantum ad singulas partes. In primis enim quod hoc non possit convenire homini ante primum instans usūs rationis, manifestum videtur: quia ut homo possit peccare venialiter, debet esse rationis & libertatis particeps: Sed ante primum instans usūs rationis & libertatis, nec rationis nec libertatis est compos, ut de se constat: Ergo sicut ante illud instans, defectu usūs rationis & libertatis, non est capax peccandi mortaliter, ita nec venialiter. Quod verò non possit id ei competere in ipso instanti usūs rationis & libertatis, vel immediate post, sic potest ostendi. Puer in primo instanti usūs rationis aut justificatur, aut peccat mortaliter: Ergo non potest in eo instanti, vel immediate post, reperi in ipso peccatum veniale cū solo originali. Consequentia patet: nam si justificetur, consequetur per gratiam remissionem originalis peccati: si verò peccat mortaliter, peccatum veniale, quod postea committit, non erit cū solo originali. Antecedens verò probatur ex dīctis in precedentibus assertiōnibus: Nam ut ibi ostendimus, puer in primo instanti usūs rationis teneat inexcusabilitē se convertere in Deum, vel explicitē, vel saltem implicitē: si adimpleat hoc p̄ceptum, eo ipso in eodem instanti à peccato originali mundatur per gratiam justificantem, quae ipsi infunditur à Deo; quia amor Dei super omnia non est comp̄sibilis cū hac culpa, sicut neque cum alia mortali, ut supra ostendimus: si verò adimplere omittat, peccat mortaliter peccato omissionis: Ergo puer in primo instanti usūs rationis, aut justificatur, aut mortaliter peccat.

215. Hanc rationem D. Thomā aliquibus instantiis enervare conantur Adversarij. In primis obiciunt, Ratio in homine non expedit omnino subit, sed successivē & paulatim ligamina ejus tolluntur, priusque pervenit ad usum imperfectum & semiplenum, quād ad plenum & perfectum: Ergo cū imperfecta deliberatio sufficiat ad peccandum venialiter, ut patet in motibus concupiscentiae promōsecundis (unde prater peccata venialia ex genere, vel ex levitate materia, admittuntur à Theologis alia, quae venialia dicuntur ex deliberatione, seu ex defectu plena & perfecta deliberationis, ut suprā declaravimus), puer ante primum instans morale usūs rationis, in quo habet plenum & perfectum discursum, seu rationis & libertatis usum, poterit peccare venialiter per aliquos motus indeliberatos: subindeque peccatum veniale cū solo originali tunc etiam in eo existere poterit.

216. Confirmatur & explicatur hoc magis. Indubitate doctrina est apud Theologos, quod delibetatio de illico obiecto mortali (quae in somno nullum est peccatum, quia totaliter usus rationis & libertatis est ligatus, & in vigilia esset mortale peccatum) inter somnum & vigiliam est tantum peccatum veniale, ob imperfectum

A usum rationis & libertatis pro illo statu in quo non adeat tanta libertas, qua ad peccatum mortale sufficiat: idem est de evigilante ex ebrietate, vel ex amentia. Similiter ergo cū puer paulatim ad primum instans morale usūs rationis & libertatis perveniat, sit quasi inter somnum & vigiliam libertatis, & veluti in crepusculo usūs rationis, nondum tamen perfectum ejus usum & illustrationem attingat, potest tunc peccare venialiter, licet defectu plena & perfecta libertatis non possit peccare mortaliter.

Ad argumentum respondeo, dato Antecedenti, negando Consequentiam. Ad cuius probationem dico cum Cajetano h̄c art. 6. s. *Ad objectionem. Quod licet ad peccandum venialiter minus libertatis sufficiat in exercitio quam in mortali, quia absque deliberatione peccatur venialiter: non tamē sufficit in facultate; quia non peccatur venialiter absque libera facultate dominandi super singulos motus, qua facultas ablique plena libertate non est.* Unde cū puer ante primum instans morale usūs rationis careat tali facultate, et si forte aliquem usum imperfectum libertatis & rationis habere possit, tamen tunc incapax est peccandi venialiter. Ex quo patet responsio ad confirmationem, & discriberem quod inter puerum ante primum instans usūs rationis, & hominem inter somnum & vigiliam constitutum, reperitur: iste enim in habitu haberet facultatem plenē deliberandi, licet non plenē & perfecte expeditam, sed aliquatenus impeditam: ille verò nec in actu, nec in habitu illam habet; & si licet primum sit capax peccandi venialiter, non tamē secundus.

Addunt Carmelitæ Salmanticenses h̄c dubio 2. s. 2. quod etsi admittamus in puero aliquam libertatem incompletam & imperfectam ante perfectum usum rationis, h̄c tamen est libertas solū ad operandum indifferenter physicè, sed non moraliter: quia cūm ob imperfectum lumen, non possit ante perfectum usum rationis cognoscere consonantiam vel dissonantiam litorum actuum à lege, ante illud tempus est incapax omnis moralitatis, quæ in subiectione actus ad regulas morum consistit, subindeque exigit in agente morali aliquam consonantia & dissonantia à lege notitiam: unde cū ad peccandum venialiter requiratur libertas ad operandum indifferenter, non solū physicè, sed etiam moraliter, eō quid peccatum veniale sit actus humanus & moralis, puer ante primum instans morale usūs rationis non potest peccare venialiter, sicut tunc non potest bene moraliter agere, nec mereri.

Secundo opponunt nobis Adversarij ad enervandam eandem rationem D. Thomæ, quod et si ante instans morale usūs rationis nequeat puer peccare venialiter, id tamen præstare poterit in illo instanti, antequam vel adimpleat p̄ceptum dilectionis Dei, vel ejus omissione mortaliter delinquat: quia cū illud instans non sit mathematicum & omnino indivisibile, sed morale, claudens in se aliquod temporis spatiū, & satisfaciens tali p̄cepto, si in toto illo instanti, vel in ejus termino adimpleatur, potest assignari tempus sufficiens ad peccandum venialiter, etiam cum plena advertentia, antequam urgeat ejus adimpletio, illud nimur quod ab initio illius instantis moralis usque ad terminum exclusivē decurrit: cur enim in illa intermedia duratione non poterit aut loqui verbum oriosum, aut leve mendacē proficer, aut vanā aliquā cogitationē admittere?

220. Respondeo, negando Antecedens. Ad cuius A probacionem dicendum cum Cajetano, quod pluri-
licet instans, pro quo urget praeceptum dilectionis Dei, non sit mathematicum, sed morale, subindeque includat tempus sufficiens ad deliberandum tam de aliis rebus, quam de adimple-
tione praecepti se convertendi in Deum, debet tamen puer ut tempore illo ad deliberandum con-
cessio, ut quamprimum possit, deliberet de scipso, & de ordinatione sui in bonum honestum; unde si non quamprimum potest deliberet, eo ipso peccat mortaliter, retardans voluntarie adimple-
tionem praecepti: sicut peccaret non adimplendo illud, statim at deliberationem perficeret. Porro qui in illo tempore necessario ad deliberandum diverteret attentionem ad verbum otiosum, vel mendacium proferendum, vel ad aliquid simile agendum, hoc ipso retardaret voluntarie delibera-
tionem que instat, & per consequens praecep-
ti adimpletionem. Cum enim (inquit Cajetanus) virtus unita sit major scipso dispersa, & à maiori virtute citius fiat aliquid, quam à minori, ceteris paribus, consequens est ut citius deliberet non divertens: ac per hoc qui ad aliud aspergit vane, non quamcū potest deliberat, liberè suam vim minuens; & sic reus est omissionis praecepti, di-
vertendo, & non quamcū oīo potest deliberando. Et quamvis non teneatur ante terminum delibera-
tionis eligere, teneatur tamen ante terminum nullum impedimentum apponere charitati, & propterea apponendo peccat mortaliter ante terminum; sicut deliberationi operam non dans ante instans quod terminasset deliberationem, peccat omissione.

221. Addo cum Salmanticensibus, quod cū in illo instanti morali Author natura tunc speciali dictamine, in intellectu pueri causato, obliga-
tionem adimplendi tale praeceptum illi intimet, eumque per talem cognitionem urgeat ad delibera-
endum de scipso in ordine ad debitum finem, vel nullo modo, vel non nisi ex industria & data
operā, potest puer ad aliud cogitandum divertiri; & ideo si qua tunc diversio fieret, vel ad dicen-
dum medacium, vel ad aliquid aliud, per quod deliberatio illa retardaretur, jam non quā ex surreptione aut semiplena tantum advertentia incidens, damnaretur ad solam culpam veniale-
m, sed ut habita ex animo, & data operā, impunaretur ad mortalem.

222. Objecies ultimō: Etsi puer in instanti usū rationis adimpleat supradictum praeceptum, & scipsum ordinet ad bonum honestum, aut explicite convertat in Deum ut authorem & finem naturalem, non tamen necesse est ut in eo instanti justificetur, subindeque à peccato originali mundetur, sed potest ejus justificatio differri, saltem per aliquod breve tempus, in quo proinde dabitur locus, ut puer ante ipsam justificatio-
nem venialiter peccet, etiam si nihil mortale committat: Ergo ruit praecipuum fundamen-
tum, cui ratio D. Thomae innititur. Consequen-
tia patet ex supra dictis. Antecedens probatur: Prinō quia ad justificationem non sufficit amor Dei praeceps ut finis naturalis, sed requiritur amor finis supernaturalis, qui est charitate. Se-
condō, quia ad justificationem requiritur etiam cognitio mysteriorum quae fides credit, ut doce-
tur in tractatu de justificatione, & de fide: Sed hanę cognitionem pueri non semper habent in primo instanti usū rationis, quia illa non habe-
tur nisi per instructionem, juxta illud Apostoli

ad Roman. 10. Quomodo credent ei quem non au-
dierunt? Quomodo autem audient sine predican-
te? plurimi autem sunt pervenientes ad ultimū rationis, qui nihil audierunt de mysteriis fidei, ne-
que habent à quo illa addiscant, ut pater de il-
lis qui apud gentiles & barbaros, ubi nulla ful-
get lux Evangelij, nutritiuntur: Ergo illi, et si in instanti usū rationis predictum praeceptum adimplent, & se in bonum honestum, aut in Deum ut authorem naturæ convertant, non tamen statim justificantur, sed post tempus, in quo de mysteriis fidei instruantur, ut ea possint cre-
dere.

B Confirmatur ex D. Thoma qu. 14. de verit. 223
art. ii, ubi proponens sibi hunc casum, nempe quod aliquis nutritus in sylvis, vel apud barba-
ros, ubi nihil de nostra fide audiret, sequeretur per omnia ductum naturalem rationis in appetitu boni & fuga mali, subindeque adimpleret praeceptum de quo agimus, non aī fore justificandum in eodem instanti, sed expectandum potius quoque Deus vel speciali revelatione manifestaret illi praedicta mysteria, vel mitteret illuc praedicatorem a quo instrueretur. Si aliquis (inquit in resp. ad t.) taliter nutritus, ductum na-
turalis rationis sequeretur in appetitu boni & fuga mali, certissime tenendum est, quod ei Deus, vel per internam inspirationem revelaret ea que sunt ad credendum necessaria, vel aliquem fidei praedicatorum ad eum dirigeret, sicut misit Petrum ad Cornelium, Actorum 10. Sed ut praedicator mitteratur, & missus perveniat, & perveniens instruat puerum, necessarium est tempus & dilatio aliqua, ut de se patet: Ergo puer ille sequens du-
ctum naturalis rationis in appetitu boni & fuga mali, subindeque adimplens praeceptum de quo agimus, non statim justificaretur, sed ejus justifi-
ficatio toto eo tempore difficeretur.

D Ad objectionem respondeo negando Ante-
cedens. Ad cuius primam probacionem dicendum est, puer praeceptum praeceptum adimplenti in-
fallibiliter à Deo conferri gratiam & charitatem, per quam justificatur: nam cū efficax conver-
sio in Deum ut finem ultimum naturalem, sit incompossibilis cum aversione ab ipso Deo ut fine supernaturali, fieri nequit ut puer infectus ori-
ginali culpā, quae est aversio ab isto fine, eliciat
talem conversionem, nisi simul aut prius ab ori-
ginali culpa mundetur: atque adeo nisi gratia &
charitas ibi concurrent, saltent ut removentes il-
lam aversionem, conversionem istam prohibent.

E Ad secundam probacionem dico, quod ad justifi-
cationem non est necessarium necessitate medi-
j cognoscere, & credere explicitè omnia ob-
jecta & mysteria fidei, sed tantum aliqua. Quæ autem illa sint, disputant Theologi 2. 2. qu. 2.
art. 8. ubi Bannez dubit. 2. satis probabilitet
cenſet, sufficere si credatur explicitè illud quod ait Apostolus ad Hebreos ii, nempe quod Deus
est, & sperantibus in fe remunerator est: unde
hanc cognitionem explicitam habent pueri, qui
adimplent praeceptum de quo agimus, & se con-
vertunt in Deum in primo instanti usū rationis.
Nec obstat quod illi interdum nihil audierint de
Deo, & de ejus providentia, aliisque mysteriis,
necessitate medijs ad justificationem credendis,
si quæ illa sint, nec aliquem habeant à quo de il-
lis instruantur: Nam si Deus suā infinitā misericordiā conferat auxilium efficax ad implendum
praeceptum puerō ita se habenti, Deus per scip-
sum immedietate illi manifestabit interius quæ-
cumque

DE PECCATO MORTALI ET VENIALI. 305

explicite sub praedicta necessitate credenda sunt: neque specialior aut magis extraordinaria censer debet haec providentia, quam illa misericordia & voluntas absoluta conferendi tali pueri auxilium efficax ad implendum praeceptum. Verba autem Apostoli, *Quomodo credere ei quem non audiunt?* intelligi debent juxta communem & regularem providentiam, juxta quam Deus hac interna manifestatione uui non vult.

226. Ad confirmationem, ex autoritate D. Thomae desumptam, respondetur primò, S. Doctorem non dicere determinatè, puerum illum in sylvis vel apud barbaras gentes educatum, & sequentem ductum naturalis rationis in appetitu boni & fuga mali, subindeque implentem praeceptum de quo agimus, esse per prædicatorem fidem, quem Deus ad eum dirigeret, instruendum de mysteriis, necessariò necessitate mediò ad justificationem credendis, sed vel hoc modo, vel a solo Deo interius illuminante, seu infundente lumen fidei ad credendum, & objecta credibili simus proponente; quod fieri potest in eodem instanti, quo puer ille adimpleret præceptum, & se convertit in Deum, subindeque in eodem instanti potest a peccato originali mundari, cum sola prioritate natura & causalitatis, quæ inter gratiam justificantem & actus ad ipsam proxime disponentes reperitur, de qua in materia de justificatione.

227. Secundò respondeo cum Alvarez, Gonzale, & aliis Thomistis, quod instruatio illa pueri in syl-

A vis nutriti, & sequentis ductum naturalis rationis in appetitu boni & fuga mali, pro qua D. Thomas ad prædicatorem exterrum recurrat, non est instructio indisponsabiliter necessaria ad justificationem, aut de illis mysteriis, quæ necessitate credere necessitate mediò ad primam gratiam obtinendam, sed de aliis, sine quibus explicite creditis potest conferri talis gratia; sicut est mysterium Trinitatis, Incarnationis, Mortis, & Resurrectionis Christi, & alia hujusmodi, ad quæ addiscenda & explicitè credenda tenetur homo quamprimum potest necessitate præcepti, immo, ut multi volunt, necessitate mediò omnino requisiti ad salutem & gloriam obtinendam. Unde recursus ille ad exterrum prædicatorem, supponit puerum, ad quem instituendum mittitur, esse jam justificatum, & per internam illustrationem de mysteriis ad justificationem necessariò credendis à Deo instructum & illuminatum; & solidum à D. Thoma requiritur, ut talis puer in fide plenius instruatur; sicut pater exemplo Cornelij, quo ibidem uritur: Cornelius enim, quando ad eum missus est Petrus, erat jam justificatus, & habebat fidem & gratiam: *Alioquin ejus operatio non fuisset accepta Deo, cui sine fide nullus placere potest*, ut ait idem S. Doctor 1. 2. quæst. 10. art. 4. ad 3. subdens: *Habebat autem fidem implicitam, nondum manifestatam Evangelij veritate: unde ut eum in fide plenius instrueret, mititur ad eum Petrus.*

